

পবিত্র ইঞ্জিল শরিফ ১৫ নম্বর ছিপারা

পয়লা তিমথি

পরিচিতি

আল্লা পাকর হুকুমে হজরত ইছা আল-মসীর সাহাবি হজরত পাউলুছে (রা:) চিঠির আকারে অউ ছহিফা লেখছইন। অনুমান করা অয়, হজরত ইছায় বেহেস্তো তশরিফ নেওয়ার ২৭-২৮ বছরর মাজে ইখান লেখা অইছে।

তিমথি নামে একজন জুয়ান মানুষ আছলা, তাইন হজরত পাউলুছরে (রা:) তবলিগ কামো সাইয্য করতা। তান মা আছলা বনি ইসরাইল জাতির আর বাফ আছলা ইউনানি জাতির। তান বাড়ি আছিল আছিয়া দেশো, ইখান অখনকুর তুরস্ক দেশর ভিতরে (সাহাবি নামা ১৬-২০ রুকু দেখবা)। লেখক হজরত পাউলুছে অউ তিমথির গেছে ই ছহিফা খান লেখছইন।

তাইন বুজাইতা চাইরা, আল্লার জমাতর মুমিন অকলর চাল-চলনর একটা মাপকাঠি আছে, জমাত চালানি আর জমাতর তালিমরও একটা নিয়ম-নীতি আছে। জমাতর লাগি জরুর অইলো, ভুল তালিম থাকি হুশিয়ার রওয়া, যোইগ্য মানষর আতো জমাত চালানির দায়িত্ব দেওয়া, আর জমাতর বেটি মানুষ, খাছ করি ডাড়ি বেটিস্তর বেয়াপারে জমাতর দায়-দায়িত্ব বাতাইল অইছে।

অউ ছিপারার ২ রুকু ৪-৬ আয়াতো আছে, “আল্লা পাকর খিয়াল অইলো, যাতে হকল মানষে নাজাত পাইন, আর আল-মসীর তরিকার হক্কলতা ষোলআনা বুজইন। ই হকিকতি অইলো, আল্লা খালি একজন, আল্লা আর মানষর মাজে শাফায়াতকারি মাজর মানুষও খালি একজনউ আছইন, এন নাম ইছা আল-মসী, এইনও মানুষ। দুনিয়ার হকল মানষর জানর বদলা হিসাবে, তাইন নিজর জান কুরবানি দিছইন।”

১-তিমথি পরিচিতি

এরমাজে আছে,

- (ক) ভন্ড মোল্লাইন থাকি জমাতরে বাচাও ১ রুকু
(খ) জমাত চালানির নিয়ম-কানুন ২-৩ রুকু
(গ) খাটি খাদিম অওয়ার পরামিশ ৪ রুকু
(ঘ) মুমিন অকলর বায় দায়-দায়িত্ব ৫:১-৬:২ আয়াত
(ঙ) চউখ রাখো আল্লার আরশর বায় ৬:৩-২১

১ আমি পাউলুছ তো আমরার তরানেআলা আল্লা পাক আর আমরার আশা-ভরসা হজরত ইছা আল-মসীরা হুকুমে তান সাহাবি অইছি।
 ২ মুমিন হিসাবে আমার খাছ আওলাদ, তিমথির গেছে লেখরাম।
 গাইবি বাফ আল্লা পাকে আর আমরার মালিক ইছা আল-মসীয়ে তুমারে রহমত, মেহেরবানি আর শান্তি দান করউক্কা।

ভগ্ন মোল্লাইন্তর বেয়াপারে হুশিয়ারি

৩ ও তিমথি, আমি মাকিদনিয়া দেশো যাওয়ার বালা তুমারে কইছলাম, অখন হিরবার মিনতি করি কইরাম, হুনো, তুমি ইফিছ টাউনোউ রও, রইয়া অনর অলা কিছু মোল্লাইন্তরে হুকুম দেও, তারা যানু মানষরে আর ভুল তালিম না দেয়। ৪ তারারে কইও, তারা যাতে বানোয়াট কিছা আর লাম্বা-লাম্বা খান্দানর লিষ্টর বায় খিয়ালি না অইন। ইতায় তো নানান নমুনর দলাদলির জনম দেয়, আল্লার কামর কুনু ফায়দা অয় না, আল্লাই ফায়দা মিলে খালি ইমানর মাজদি। ৫ বরং সঠিক তালিমর ফল অইলো, মায়্যা-মহব্বত, ইতা তো খাটি দিল, পরিস্কার বিবেক আর হাছারর ইমান থাকি পয়দা অয়। ৬ অইলে কিছু মানষে ইতা বাদ দিয়া বানোয়াট মাত-কথার বায় মন দিলাইছে। ৭ তারা যুদিও নিজেউ নিজর মাতর মানি বুজে না, আর যে বেয়াপার লইয়া বড় গলায় মাতের, ই বেয়াপারেও ভালামন্তে জানে না, তেবউ তারা মুছা নবীর বাতাইল শরিয়তর উস্তাদ অইতো চায়।

৮ আমরা জানি, শরিয়ত ভালা জিনিস, কেউ যুদি ঠিক মতো ইতা কামো লাগায়। ৯ আমরা তো জানি, ই শরিয়ত কুনু পরেজগার মানষর লাগি দেওয়া অইছে না। ইখান দেওয়া অইছে, যেতায় আল্লার আইন মানইন না, আল্লারে ডরাইন না, নাফরমানি করইন, গুনাগার, খুনি, নাপাক আর বে-দীন, মা-বায়ফর খুনি, ১০-১১ জিনাকুর, সমকামি, বান্দি-গুলামর কারবারি, মিছা মাতরা, মিছা সাক্ষি দেওরা, এক কথায় গুনগানে ধনি আল্লা পাকর মহান খুশ-খবরির তালিমর বিরুধি যেতা মানুষ, অতার লাগিউ ই শরিয়ত দেওয়া অইছে। আর অউ মহান খুশ-খবরি তবলিগর ভার তাইন আমারে দান করছইন।

মেহেরবানির লাগি শুকরিয়া

১২ হজরত ইছা আল-মসী, যেইন আমার মালিক, তাইন আমারে বল যুগাইছইন, আমারে হক-হালাল মনো করিয়া তান কামো বওয়াল করছইন, এরলাগি আমি তান দরবারো শুকরিয়া জানাইরাম। ১৩ যদিও আমি আগে আল-মসীর বদনাম গাইতাম, তান মানষর উপরে জুলুম করতাম, বদ-মিজাজ দেখাইতাম। তা-ও তাইন আমারে রহমত দান করছইন, কারন হউ সময় আমি ইমান আনছিলাম না। ১৪ আমার মুনিবে আমারে কতো বড় মেহেরবানি করছইন, ইছা আল-মসীর তরিকা কবুল করলে যে ইমান আর মহব্বত পয়দা অয়, ইতা তো আমারে পুরাপুর দান করছইন।

১৫ আসলে ই কথা তো হক-খাটি আর ষোলআনা মানার লাখ, গুনাগার অকলর জান বাচানির লাগিউ ইছা আল-মসীয়ে ই দুনিয়াত তশরিফ আনছিল। অউ গুনাগারর মাজে আমিউ পরধান। ১৬ অতার লাগিউ আল্লায় আমারে দয়া করছইন, যাতে আমার মতো পরধান গুনাগারর মাজদি ইছা আল-মসীয়ে তান সীমা ছাড়া ছবরগারি দেখাইতা পারইন, আর তান উপরে ইমান আনায় যেরা আখেরি জিন্দেগি পাইবা, তারা যানু আমারে দেখিয়া আল্লাই পথ বুজইন। ১৭ যেইন চিরকালিন বাদশা, যেইন নিরাকার, একমাত্র আল্লা, যান কুনু ক্ষয় নাই, তান ইজ্জত আর গৌরব হর-হামেশা জারি রউক। আমিন।

১৮ ও মায়ার পুত তিমথি, তুমার বেয়াপারে আগে যেতা বাতুনি মাত মাতা অইছিল, অউ মাফিক আমি তুমারে মিনত করি কইরাম, তুমি ইতা মনো রাখিয়া আল-মসীর লাগি দিলে-জানে লাড়াই করাত রও। ১৯ এরলগে নিজর ইমান আর পরিস্কার বিবেকরে বাচাইও। কুনু কুনু মানষে বিবেকর বুলি না মানিয়া, নিজর ইমানরে নষ্ট করিলিছে। ২০ ই দলো আছইন, হুমিনাছ আর ছিকন্দর। এরলাগি আমি ইতারে ইবলিছর আতো সপি দিছি, যাতে তারা বুজতা পারইন, কুফুরি মাত মাতা ঠিক নায়।

দোয়া-মুনাজাতর নিয়ম-কানুন

২ আমি পয়লাউ জানাইরাম, পরতেক মানষর লাগি তুমরা আল্লার দরবারো কাকুতি-মিনতি, দোয়া-মুনাজাত, ফরিয়াদ জানাও আর

শুকরিয়া আদায় করে। ২ অলাখান রাজা-বাদশা অকল আর উচা পদর হকল অফিসারর লাগি মুনাজাত করা জরুর, যাতে আমরা আল্লার ডর-খফ মনো রাখিয়া, হক-হালাল পথে রইয়া, নিরাপদে শান্তিয়ে জিন্দেগি কাটাইতাম পারি। ৩ ইতা তো আমরা তরানেআলা আল্লার নজরো নেক কাম, ইতায় তাইন খুশি অইন। ৪ আল্লা পাকর খিয়াল অইলো, যাতে হকল মানষে নাজাত পাইন, আর আল-মসীর তরিকার হকলতা ষোলআনা বুজইন। ৫ ই হকিকতি অইলো, আল্লা খালি একজন, আল্লা আর মানষর মাজে শাফায়াতকারি মাজর মানুষও খালি একজনউ আছইন, এন নাম ইছা আল-মসী, এইনও মানুষ। ৬ দুনিয়ার হকল মানষর জানর বদলা হিসাবে, তাইন নিজর জান কুরবানি দিছইন। অউ বেয়াপারে তো আল্লার ঠিক করা সময়ে সাক্ষি দেওয়া অইছে। ৭ আর অউ সাক্ষি দিবার লাগি আল্লায় আমারে তবলিগ কামো, সাহাবি পদো বওয়াল করছইন, তাইন আমারে দায়িত্ব দিছইন, ভিন জাতির গেছে ইমান আর আল্লাই হকর উস্তাদ হিসাবে। আমি ইতা হক মাত মাতিয়ার, মিছা কুস্তা নায়।

৮ আমি চাইরাম, হকল জাগার বেটাইন্তে খালিছ নিয়তে দুইও আত তুলিয়া মুনাজাত করউক। তারার মনর মাজে কুনুজাত রাগ-গুছা বা কাইজ্জা-ফসাদর ভাব না রউক।

৯ আমি এওখানও চাইরাম, বেটিন্তে তারার হায়া-শরম রাখিয়া সমাজর উপযুক্ত বেশে ভদ্র কাপড়-চুপড় ফিন্দউক। তারা যানু নানান নমুনায় চুলর বেনী বলিয়া, সোনা-রুপা আর মনি-মুক্তার গয়না লাগাইয়া আর দামি দামি কাপড় ফিন্দিয়া নিজরে না হাজাইন। ১০ বরং আল্লার পরেজগার বান্দিয়ে যেলা নেক কামর মাজে জিন্দেগি কাটানি উচিত, তারাও অলা অইন। ১১ কর্তার পুরাপুর বাইখ্য রইয়া, আর নিরাই-জিরাই রইয়া ইলিম কামাই করউক্লা। ১২ উস্তাদি করা আর বেটাইন্তর উপরে মুছদরি করার অধিকার আমি কুনু বেটিরে দেই না। তারা নিরাই-জিরাই রওয়া জরুর। ১৩ জানো তো, হকল পয়লা আদমরে আর বাদে বিবি হাওয়ারে পয়দা করা অইছিল। ১৪ আদম তো ইবলিছ-শয়তানর ধুকাত পড়ছইন না, অইলে হাওয়া ইবলিছর ধুকাত পড়িয়া আল্লার হুকুমর বরখেলাফ করছইন। ১৫ অখন যদি বেটিন্তে তারার হায়া-শরম রাখিয়া ইমান, মহক্বত আর পাক-পবিত্র অইয়া চলইন, তে হুরুতা জনম দেওয়ার মাজদি তারা রেহাই পাইবা।

জমাতর চালকদার আর খাদিম

হুনো, আসল হক কথা অইলো, কেউ যদি জমাতর চালকদার অইতা চাইন, তে তাইন তো নেক কাম করার খিয়ালি অইছইন।

১ জমাতর চালকদার মানষর চখুত নিখুত অইতে অইবো। তান খালি এক বউ অইবো। তাইন নিজরে সামলাইয়া রাখবা, তান ভালা আখল-বুদ্ধি রইবো, স্বভাব অইবো ভদ্র, আর মেহমানদারি করতে ভালা পাইবা। মানষরে তালিম দেওয়ার খেমতা থাকতে অইবো।

২ তাইন যানু মদখুর আর বদ-মিজাজি না অইন, বরং তান স্বভাব অইবো নরম, তাইন যানু মাইর-দাংগা কররা বা টেকা-পয়সার লালছি না অইন।

৩ তাইন যানু সঠিক ভাবে তান নিজর পরিবারর হক্কলতা চলাইন, তান হুরুতাইন অইবা বাইধ্য আর আদব-কায়দা মানরা।

৪ যে মানষে তার নিজর ঘর সামলাইতো পারে না, হে আল্লার জমাতরে কিলা দেখা-হুনা করবো? ৫ কুনু নয়্যা ইমানদার তাই জমাতর চালকদার অওয়া ঠিক নায়, ইলা অইলে তাইন হয়তো বড়াই-বেটাগিরিয়ে বাহাদুরি করবা, আর ইবলিছর লাগি ঠিক করা সাজার ভাগি অইবা।

৬ জমাতর বাইরর মানষর গেছে তান সুনাম থাকা দরকার, যাতে আখতা কুনু বদনামর ভাগি না অইন আর ইবলিছর ফান্দো না পড়ইন।

৭ অউলা জমাতর খাদিম অকলও ইজ্জতি আর এক কথার মানুষ অওয়া জরুরি। এরা যাতে মদখুর আর হারাম লোভ-লালছি না অইন। ৮ তারা যানু হক বিবেকে ইছায়ী ইমানর বাতুনি বেয়াপাররে মজবুত করি দিলো রাখইন। ৯ এরলাগি পয়লা তারারে যাচাই করি দেখা জরুর, যাচাইত যদি তারা নিখুত অইন, তে জমাতর খাদিম অইতা পারবা।

১০ ঠিক অলাখান বেটি মানুষও যানু ইজ্জতি অইন। এরা মানষর বদনাম না গাইন, নিজরে সামলাইয়া রাখইন, আর হকল বেয়াপারে বিশ্বাসি অইন।

১১ খাদিম ছাব খালি এক বউ আলা মানুষ অইবা। তাইন যানু ভালামন্তে তান বউ পুয়া-পুড়িন আর সংসারর দেখা-হুনা করইন। ১২ যে খাদিমে ভালামন্তে খেজমত করইন, এইন সুনাম পাইন, আর হজরত ইছা আল-মসীর উপরে ইমান থাকায় তান দিল সাওসে ভরা রয়।

ইছায়ী ইমানর বাতুনি বেয়াপার

১৪ ও তিমথি, আমি আশা কররাম খুব জনদিউ তুমার গেছে আইতাম। অখান মনো করিয়া তুমারে ইতা লেখরাম। ১৫ যদি কুনু কারনে আমার আইতে দেরি অইয়ায়, তে ই লেখা পড়লে তুমি বুজবায়, আল্লার পরিবারর মানষর চাল-চলন কিলা অইতো। ই পরিবার তো জিন্দা আল্লার জমাত, আল্লাই হকিকতর ভীত আর ইয়ান খুটি। ১৬ ইছায়ী ইমানর মারিফতি কত মহান, ইতা তো অস্বীকার করা যায় না। অউ মারিফতি অউলা জাইর অইলো,

তাইন মানুষ ছুরতে জাইর অইলা,
পাক রুহে পরমান অইলা বে-কছুর,
ফিরিস্তা অকলে তান দরশন পাইলা।
তান বেয়াপারে হক্কল জাতির গেছে তবলিগ করা অইলো,
আস্তা দুনিয়ার মানষে তান উপরে ইমান আনলা,
গৌরব-মহিমায় তানরে উপরে তুলি নেওয়া অইলো।

ভন্ড বৈরাগির তালিম থাকি হুশিয়ার

৪ ও তিমথি, আল্লাই পাক রুহে পরিস্কার করি কইরা, আখেরি জমানাত কিছু মানুষ ইছায়ী ইমান থাকি হরিযিবো, তারা না-হক রুহ আর জিন-ভুতর তালিমর আশিক অইবো। ১ যেতা বেইমান অকলর বিবেক-বুদ্ধি অসাড় অইগেছে, অতার ভন্ডামির দায় অলা অইবো। ২ ইতায় মানষরে কড়াকড়ি হুকুম দেইন বিয়া-শাদি না করার লাগি, আর কুনু কুনু খানি খাইতেও নিষেধ করইন। অইলে আল্লায় তো ই খানি পয়দাউ করছইন, যেরা ইমান আনছে, যেরা আল্লার হকরে জানিলিছে, তারা যাতে আল্লার শুকরিয়া আদায় করিয়া ইতা খাইন। ৩ আল্লার পয়দা করা হক্কল জিনিসউ ভাল। হারাম মনো করিয়া কুনুতা বাদ দেওয়া ঠিক নায়, বরং আল্লার শুকরিয়া আদায় করিয়া খাওয়া যায়। ৪ কারন আল্লার কালাম আর ই মুনাজাতর মাজদি ইতা পাক-পবিত্র অইয়ায়।

হজরত ইছার খাটি খাদিম অণ্ড

৬ ও তিমথি, তুমি যুদি অউ তালিম অকল মুমিন ভাইয়াইনরে বুজাইয়া দেও, তে ইছায়ী ইমানর যে হক আর নির্ভুল তালিম মানিয়া চলরায়, ই বেয়াপারে তুমি পাকা-পুত্ত অইয়া আল-মসীর একজন উপযুক্ত খাদিম অইবায়। ৭ তুমি আজে-বাজে কিচ্ছা-কাহিনি থাকি হরিয়া রইও, ইতা তো দাদি-নানির কওয়া বানাইল কিচ্ছার লাখান। এরলাগি ইতা বাদ দিয়া দিলর ইমানি বেয়াম করাত রও। ৮ শরিলর বেয়াম করলে কিছু ফায়দা অয়, অইলে দিলর ইমানি বেয়ামে হক্কল বায় থাকি ফায়দা অয়। এরমাজে তো খালি ই দুনিয়া নায়, আখেরাতির আশাও আছে। ৯ ইতা তো পুরাপুর হক আর খাটি, ষোলআনা কবুল করার লাখ। ১০ এরলাগিউ আমরা জানে-পরানে ইমানর মেনত করিয়ার আর খিয়ালি অইয়া কাম করিয়ার। কারন আমরা তো জিন্দা আল্লার উপরে ভরসা করি। তাইনউ হকল মানষর তরানেআলা, খাছ করি যেরা তান উপরে ইমান আনে।

১১ তে তুমিও অউ বেয়াপারে হুকুম আর তালিম দেও। ১২ তুমি জুয়ান বেটা মনো করিয়া কেউ যানু তুমারে এলা না করে, এরলাগি মাত-কথায়, চাল-চলনে, মহব্বতে, ইমানে আর পাক-পবিত্রতায় তুমি মুমিন অকলর গেছে একটা নিশানা বনিয়াও। ১৩ আর আমি আইবার আগ পর্যন্ত তুমি মুমিন অকলরে পাক কালাম তিলাওত করা, সু-পরামিশ দেওয়া, আর তালিম দেওয়াত লাগাইল রইও। ১৪ মনো রাখিও, জমাতর মুরক্বি অকলে তুমার উপরে আত রাখিয়া, নবীর লাখান গাইবি বুলি মাতিয়া তুমারে খেলাফতি দিছইন, তে তুমি ই নিয়ামতরে এলামি করিও না। ১৫ ইতা বেয়াপারে খিয়ালি অণ্ড, নিজরে অতার মাজে পুরাপুর ডুবাইয়া রাখো, তেউ হকলর চখুত পড়বো তুমি আগেদি আগুয়াইরায়। ১৬ তুমার নিজর বেয়াপারে আর তুমার তালিমর বেয়াপারে হুশিয়ার রইও। তেউ তুমি নিজরে বাচাইবায়, আর যেরা তুমার বয়ান হুনবো, তারারেও বাচাইতায় পারবায়।

মুমিন অকলর বায় দায়-দায়িত্ব



ও তিমথি, হুনো, কনু মুরক্বি মানষর দুষ দেখানিত গিয়া কড়া ভাষায় মাতিও না। তারার লগে নিজর বাফর লাখান বেবহার

করিও। আর জুয়ান অকলরে নিজর ভাই মনো করিয়া হেদায়ত করিও।

৫ মুরকি বেটিনরে নিজর মা আর পুড়িস্তরে বইন মনো করিয়া, মনর ভাব পাক-পবিত্র রাখিয়া তারারে হেদায়ত করিও।

৬ যেতা ডাড়ি বেটিস্তর কেউ নাই, তারারে খুব যতন করি দেখা-হুনা করিও। ৭ অইলে কুনু ডাড়ি বেটিস্তর যদি পুয়া-পুড়িন বা নাতি-নাতনি থাকইন, তে আল্লার ডরে এরাউ যানু পয়লা যারযির পরিবারর দেখা-হুনা করে। অউ নমুনায় তারার ময়-মুরকির মায়া-মমতার রিন শোধ করতা পারবা, আর ইতা কামে তো আল্লা খুশি অইন।

৮ যে ডাড়ি বেটিস্তর কেউ নাই, তারা খালি আল্লার উপরে ভরসা রাখিয়া, দিনে-রাইতে তান দরবারো মুনাজাত আর কান্দা-কাটি করাত রইন। ৯ অইলে যেতা ডাড়ি বেটিস্তে যেমনে মনে চায় এমনে চলইন, ইতা তো জিন্দা হালতেউ মরা। ১০ অউ বেয়াপারে হুকুম দেও, যাতে কেউ তারারে দুষি কওয়ার সুযোগ না পায়।

১১ যে জনে আপন জনরে, খাছ করি নিজর পরিবারর মানষর দেখা-হুনা করে না, হে আসলে ইছায়ী ইমানরেউ অস্বীকার করলো। ইগু তো বিধর্মী থাকিও বাদ।

১২ এরলাগি ডাড়ি বেটিস্তর নামর লিষ্ট করার বালা আগে দেখতে অইবো, ই বেটির বয়স ষাইট বছর অইছে নি, আর জামাইর বায় তাইন পুরাপুর হক-হালালি আছলা নি। ১৩ এছাড়া নেক কামর লাগি তান সুনাম থাকতে অইবো, অউ নেক কাম অইলো, পুয়া-পুড়িন মানুষ বানানি, মেহমানদারি করা, আল্লার বন্দা অকলর পাও ধোয়ানি, দুখ-মছিবতি মানষরে সাইয্য করা, আর হকল নমুনার নেক কামো শরিক অওয়া।

১৪ কুনু জুয়ান ডাড়ি বেটির নাম ই লিষ্টো তুলিও না। কারন তারার যৌবনর লাগি শরিলর গরমে যেবলা উতাল-পাতাল করইন, অউ সময় আল-মসীর বায় তারার ডর-ভয় কমি যায়, তেউ তারা হিরবার বিয়া বইতা চাইন। ১৫ এরলাগি তারা আল্লার লগর আগর ওয়াদা ভংগ করইন, নিজর উপরে গজব ডাকিয়া আনইন। ১৬ আর তারা বাড়িয়ে বাড়িয়ে আড্ডা মারিয়া কুড়িয়া বনিয়াইন। খালি কুড়িয়া নায়, যেতা মাত-কথা তারার লাগি জাইজ নায়, অতা বাজে মাত-কথাও মাতইন আর পরর গিবত গাওয়াত রইন।

১৭ এরলাগি আমি অউ নছিয়ত করিয়ার, জুয়ান ডাড়ি বেটিস্তে বিয়া-শাদি করাউ ভাল, তারা হুরুতার মা অউক, নিজর সংসারর দেখা-হুনা করউক, আর দুশমনরে কুনু লাখান বদনাম গাওয়ার সুযোগ না দেউক। ১৮ কয়জন

ড়াড়ি বেটিন এর মাজেউ তো বে-পথি বনিয়া শয়তানর পথে চলা-ফিরা কররা।

৫৬ কুন্সু ইছায়ী ইমানদার বেটি মানষর ঘরো যুদি ডাড়ি বেটিন থাকইন, তে অউ বেটিয়ে যানু এরার দেখা-হুনা করইন। এরারে দেখা-হুনার ভার জমাতর উপরে না দেওয়া ভাল। তেউ যেতা ডাড়ি বেটিন একদম লাছার, জমাতে তারার দেখা-হুনা করতে সুবিধা অইবো।

৫৭ জমাতর যে পরধান মুরক্বি অকলে জমাতরে ভালামস্তে চালাইন, খাছ করি যেরা আল্লার কালাম তবলিগ আর তালিম দেওয়ার লাগি মেনত করইন, তারা ডাবুল ইজ্জত পাওয়া জরুর। ৫৮ আল্লার কালামো তো আছে, “ধান মাড়া দেওয়ার সময় গরুর মুখো হুফি লাগাইও না।” আরক আয়াতো আছে, “কামলায় তার বেতন পাওয়ার যোইগ্যা।” ৫৯ মনো রাখিও, দুই বা তিন জন সাক্ষির কথা ছাড়া, জমাতর মুরক্বির বিরুদ্ধে কুন্সু নালিশ সমজিও না। ৬০ অইলে যে মুরক্বি অকলে গুনা করাতউ থাকইন, জমাতর মানষর গেছে তারার দুষ জাইর করিও, যাতে অইন্য হকলে ডরাইন।

৬১ হুনো, আল্লা পাক, মালিক ইছা আল-মসী, আর আল্লার মায়ার ফিরিস্তা অকলরে সাক্ষি রাখিয়া তুমারে অউ হুকুম দিরাম, তুমি নিরোপক্ষ রইয়া ইতা কাম করিও, কেউররে পর বা আপন মনো করিও না। ৬২ চট করি কেউররে খেলাফতি দিয়া, কুন্সু পদো বওয়াল করিও না। অইন্য মানষে যেবলা গুনার কাম করে, তুমি তারার লগে শরিক অইও না, নিজরে নিখুত রাখিও।

৬৩ আর কয়দিন বাদে-বাদেউ তুমার বেমার অয়, এরলাগি তুমি খালি পানি খাইও না, থুড়া থুড়া আংগুরর শরবতও খাইও, তেউ অজম অইবো।

৬৪ খিয়াল রাখিও, কুন্সু কুন্সু মানষর গুনা অলা পরিস্কার দেখা যায়, এরলাগি তার বিচার আগেউ অইয়ায়। আর কুন্সু কুন্সু মানষর গুনা বাদে ধরা পড়ে। ৬৫ অলাখান নেক কাম পরিস্কার দেখা যায়, আর কুন্সু নেক কাম পরিস্কার দেখা না গেলেও, ইতা লুকাইল রয় না।

৬ হুনো, যে গুলাম-বান্দিয়ে মুনিবর গুলামি করইন, তারা হকলেউ যারযির মুনিবরে ইজ্জতি জন মনো করউক, যাতে কেউ আল্লার নামরে বা আমরার তালিমরে খারাপ কওয়ার সুযোগ না পায়। ৬৬ যে জনে ইছায়ী ইমানদার কুন্সু মুনিবর গুলামি করইন, এইন যানু ইমানদার ভাই হিসাবে তান মুনিবরে এলামি না করইন বরং আরো ভালা করি তান খেজমত

করইন। কারন গুলামর খেজমতে যে মুনিবে উপকার পাইরা, তাইন তো মায়ার ইমানদার ভাই। তে অতা বেয়াপারে তুমি তালিম আর হুকুম দেও।

ভুল তালিম আর আসল ধন

৩ কেউ যদি ইতা বাদ দিয়া দুছরা কুনু তালিম দেয়, আর আমরার মালিক ইছা আল-মসীর খাটি তালিম আর আল্লার ডর-খফর তালিমরে না মানে, ৪ হে তো মিছা অহংকারি, হে কুস্তাউ বুজে না, মতভেদ করা, বেহুদা উফতামি করা তার একটা বেমার। অতার কারনে ইংসা-নিন্দা, কাইজ্জা-ফসাদ, কু-সন্দয় পয়দা অয়। ৫ আর অসাড় বিবেক আলা মানষর মাজে হামেশা গোলমাল লাগাইলউ থাকে। ইতা মানষর মাজে আল্লাই হক নাই। তারা ইছায়ী ইমানরে দুনিয়াবি লাভর উপায় মনো করে।

৬ আসলে মনর তুষ্টিয়ে ইছায়ী ইমান মাফিক জিন্দেগি কাটাইলে খুব বেশি লাভ অয়। ৭ আমরা দুনিয়াত আইবার কালো তো কুস্তাউ লগে লইয়া আইছি না, আর যাওয়ার কালোও কুস্তা নিতাম পারতাম নয়। ৮ এরলাগি খালি খানি-কাপড় পাইলেউ আমরা খুশি রইমু। ৯ অইলে দুনিয়াত যেরা ধনি অইতো চায়, তারা নানান নমুনার পরিষ্কাত আর ফান্দো পড়ে, তারার মনো খুব বদ খাইশ পয়দা অয়, যেতায় তারার জিন্দেগিরে সর্বনাশর গাতো ফালায়। ১০ কারন হকল নমুনার বদ কামর জনম অইলো টেকা-পয়সার মায়া। কুনু কুনু জন টেকা-পয়সার লালছে ইছায়ী ইমান থাকি হরিয়া গিয়া, নিজর উপরে বড় দুখ-মছিবত ডাকিয়া আনছে।

চউখ রাখো আল্লার আরশর বায়

১১ অইলে তুমি তো আল্লার বন্দা, তুমি ইতা বদ কাম থাকি হরিয়া রও। তুমি পাক-পরেজগার জিন্দেগি, আল্লার ডর-খফ, ইমান, মহব্বত, ছবর, আর নরম স্বভাবর বায় থিয়ালি অও। ১২ ইমানি লাড়াই করা ত রও। আখেরাতির যে জিন্দেগির লাগি আল্লা পাকে তুমারে দাওত দিছইন, হউ জিন্দেগিরে তুমি মজবুত করি ধরো। তুমি তো ইমানি সাক্ষি দিছলায় বউত মানষর ছামনে। ১৩ অখন আল্লা পাকর নামে, যেইন হক্কলতার জান দেইন, আর যেইন হাকিম পন্তীয় পিলাতর ছামনে নিজর বেয়াপারে হক

সাক্ষি দিছলা, হউ ইছা আল-মসীর নামেও তুমারে অউ মিনতি কররাম,
 ১৪ আমরার মালিক ইছা আল-মসী জাইর অওয়ার আগ পর্যন্ত তুমি পুরাপুর
 নিখুত আর বদনাম ছাড়া রইয়া হুকুম আদায় করো। ১৫ আর গুনগানে ধনি
 হউ আল্লা, যেইন একমাত্র সম্রাট, বাদশা অকলর বাদশা আর মালিক
 অকলর মালিক, তাইনউ তান উপযুক্ত সময়ে আল-মসীরে জাইর করবা।
 ১৬ খালি আল্লা পাকরেউ মউতে কবজা করতো পারে না। তাইন অলা এক
 নুরর ফরো বসত করইন, হিনো কুনু আদম জাত যাইতো পারে না। কুনু
 আদমে কুনুদিন তানরে দেখছেও না, দেখার তাক্কতও নাই। ইজ্জত আর
 খেমতা চিরকাল খালি তানউ। আমিন।

১৭ হুনো, অউ দুনিয়ার ধনি অকলরে হুকুম দেও, তারা যানু বড়াই না
 করইন, আর দুনিয়াবি অস্থায়ী ধনর উপরে ভরসা না করিয়া, আল্লার উপরে
 ভরসা করইন। আমরার ভালাইর লাগি তাইনউ হকলতা খুলা আতে দান
 করইন। ১৮ আর তারারে কও, তারা যানু অইন্যর ভালাই করে, নেক কাম
 করাত রয়, মন খুলিয়া দান-খয়রাত করে, আর তারার ধন-দৌলতর বাট
 অইন্য মানষরে দেয়। ১৯ তেউ তারা নিজর লাগি এমন ধন জমা করবো,
 যেতা ভবিষ্যতে তারার লাগি এখন মজবুত ভীতর লাখান অইবো। এতে
 হাছারর জিন্দেগিরে তারা শক্ত করি ধরিয়া রাখতো পারবো।

২০ ও তিমথি, তুমার জিন্মায় যে সম্পদ দেওয়া অইছে, ই সম্পদ তুমি
 ভালামন্তে হেফাজত করো। আজে-বাজে আখলর বেকামা বিদ্যার বুলির
 দু-নছলা তালিম থাকি হরিয়া রও। ২১ কুনু কুনু জন অতা বেকামা আখল
 দেখানিত গিয়া, আসল ইমান থাকি বে-পথে গেছেগি।

আল্লা পাকে তুমরারে রহমত দান করউক্লা। আমিন॥